



KOMUNIKADU IMPRENSA

Centro Chega!!P Organiza Seminariu ho tema “Rekonsiliasaun Hosi Perspektiva Kultural no Justisa Formal iha Kontestu Promosaun Paz no Harii Konfiansa iha Sosiedade”.

Covalima – (11 Outobru 2025), Centro Nacional Chega!!P organiza seminariu ho tema **“Rekonsiliasaun Hosi Perspektiva Kultural no Justisa Formal iha Kontestu Promosaun Paz no Harii Konfiansa iha Sosiedade”**, ne'ebé realiza iha Salaun Ambo One Suai, Covalima, iha âmbito Festival Fronteira (FF) 2025 ho tema “Interkambiu Kultural ba Hametin Rekonsiliasaun”.

Objetivu hosi seminariu ne'e mak atu explora no hametin komprensaun kona-ba sinerjia entre mekanizmu kulturál no justisa formál, hodi deskobre mekanizmu rekonsiliasaun ida ne'ebé mak iha abut ne'ebé metin iha matenek lokál, nune'e bele kontribui ba harii paz ne'ebé sustentavel iha Timor-Leste.

Objetivu seluk mak, atu reflete kona-ba papél mekanizmu kulturál nian nu'udar instrumentu rekonsiliasaun. Kompara efetividade sira hosi instrumentu kulturál no formál nian iha harii konfiansa sosiál. Identifika pontu komún no sinerjia potenciál sira entre kultura no justisa formál hodi apoia paz ne'ebé sustentável. Dezenvolve rekomendasaun akadémika sira hodi hametin política sira rekonsiliasaun nian ne'ebé bazeia ba sinerjia entre kultura no justisa formál.

Iha sosiedade Timor-Leste nian, rezolusaun konfliktu la'ós de'it hala'o liu hosi mekanizmu formál estaduál nian, maibé mós liu hosi lei kostumeiru (tara bandu, nahe biti boot, lisan, no rituál tradisionál sira seluk) ne'ebé hatutan hosi jerasaun ba jerasaun. Mekanizmu kostumeiru sira-ne'e serve la'ós de'it atu rezolve aktu violasaun ba norma sosiál sira, maibé mós atu restaura relasaun sosiál sira, restaura dignidade, no restaura harmonia iha comunidade nia laran.

Tradisaun sira hanesan nahe biti boot fo espasu partisipativu ba parte hotu-hotu ne'ebé envolve iha konfliktu atu hatu'o sira-nia hanoin. Prosesu ida-ne'e la'ós enfaze de'it ba kastigu, maibé mós restaurasaun relasaun entre autór, vítima, no comunidade. Nune'e, lei kostumeiru nu'udar instrumentu ida ne'ebé efektivu atu harii hikas konfiansa sosiál iha comunidade nia laran.

Maibé, iha kontestu estadu moderna, iha dezafiu atu liga mekanizmu kostumeiru sira ho sistema justisa formál. Justisa formál orienta ba serteza legál, protesun ba direitu individuál sira, no prinsipiu universál sira direitu umanu nian. Entretantu, lei kostumeiru fo énfaze boot liu ba harmonia komunitária no rekonsiliasaun sosiál. Tensaun no sinerjia potenciál sira entre rua ne'e importante atu diskute, partikularmente iha kontestu atu harii paz ne'ebé sustentável iha Timor-Leste.

Tanba ne'e, semináriu ne'e hala'o hodi reflete papél mekanizmu kulturál iha rezolusaun konfliktu no kompara ho justisa formál, ho objetivu atu hetan pontu komún ne'ebé bele hametin rekonsiliasaun, paz, no konfiansa iha comunidade nia laran.

Ba informasaun liu tan kontaktu:

Raimundo Sarmento Fraga
Ofisiál Média no Komunikasaun
Email: rsfraga@centrochega.gov.tl
Nú. kontaktu: 7874 0345

Boilerplate

Centro Nacional Chega!!P, *Da Memória à Esperança* (Centro Chega! I.P) hamri'ik nu'udar institutu públiku ida ne'ebé estabesele ho dekretu Lei nº. 48/2016. Centro Chega!!P nia vizaun mak: "Sosiedade ida ne'ebé inkluzivu, la repete istória pasadu nian, moris iha dame, no respeitu ba direitus umanu". Nia misaun mak: "Harii sentru Pós-konflitu ne'ebé prezerva memória pasadu nian hodi promove direitus no valór umanu, harii parseria nasional no internasionál hodi reforsa rede servisu sira ba implementasaun rekomendasaun sira hosi Relatóriu Final *Comissão de Acolhimento, Verdade e Reconciliação* (CAVR)-Chega! no *Comissão da Verdade e Amizade* (CVA) - *Per Memoriam Ad Spem*, sira ne'ebé relevante".